

Här Fernand Etgen  
President vun der Deputéiertechamber  
19, um Krautmaart  
L-1728 Lëtzebuerg

Mamer, den 18. November 2021

Här President,

sou wéi d'Chambersreglement et virgesäit, bieden ech lech, dës parlamentaresch Fro un den Här Educatiounsminister weiderzeleeden.

D'ALEH (Association luxembourgeoise des enseignants d'histoire) huet rezent hir Meenung geäußert zu de Lëtzebuenger Geschichtsbicher. Si sinn der Meenung, datt eis Léierbicher net wierklech dat reflektéieren, wat geléiert soll ginn. Iwwerdeems si si der Meenung, datt en Defizit besteet beim lokal fundéierte Wëssen an an deem Sënn méi Wäert misst geluecht ginn op déi spezifesch Lëtzebuenger Geschicht. Wéi d'Äntwert op meng parlamentaresch Fro (N°4635) leider weist, gräift Lëtzebuerg bei de Léierbicher traditionell op auslännescht Material zeréck, esou datt et sech vun eleng versteet, datt de Schwéierpunkt am Geschichtsunterricht net op déi Lëtzebuenger Geschicht ka geluecht ginn. Der ALEH no géif et vill Ufroe vu Säite vun der zoustännege Programmkommissioun, fir esou Léiermaterial auszeschaffen. Den Här Educatiounsminister Claude Meisch huet an deem Kontext geschriwwen: "Darum wäre ich nicht abgeneigt, ein Projekt zur Ausarbeitung von Lehrmaterialien zur Luxemburger Geschichte zu unterstützen."

An deem Kontext hätt ech folgend Fro un den Här Minister:

- Wou sinn aktuell d'Aarbechten drun, fir e Projet op d'Been ze stellen, deen am Hibléck op d'Léiermaterial besonnesch op déi national Dimensioun vum Geschichtsunterricht soll agoen?

Mat déiwem Respekt,



Fred Keup  
Deputéierten



**Äntwert vum Minister fir Educatioun, Kanner a Jugend, Claude Meisch, op d'parlamentaresch Fro  
Nr. 5262 vum honorabelen Här Deputéierte Fred Keup**

An senger Fro bezitt den honorabelen Deputéierten sech op Aussoen, déi am Kader vun enger Manifestatioun vun der Association luxembourgeoise des enseignants d'histoire (ALEH) an der Nationalbibliothék gemaach goufen.

An der Diskussioun gouf et eng grouss Eenegkeet doriwwer, datt et wichteg wier, d'Lëtzebuerger Geschicht an eng transnational Perspektiv ze stellen a generell der Lëtzbuerger Geschicht eng méi grouss Plaz am Enseignement ze ginn. Dat ass net ze verwiessele mat enger "nationaler" Geschichtsschreiwung oder engem Enseignement, deen sech op eng "national" Perspektiv géif reduzéieren.

Wat de Sujet vun de Léiermaterialie betrëfft, sou muss een ënnerscheeden tëscht dem Enseignement secondaire general (ESG) an dem Enseignement secondaire classique (ESC).

Am ESC gräift een zënter Joerzénkten op auslännesch Bicher an Unterrichtsmaterialien zeréck, während een am ESG zënter den 1990er Joren op eege Lëtzebuerger Editiounen setzt, wéi d'Serie "Entdecken und Verstehen" et weist.

Ergänzend kënnen d'Enseignantë souwuel am ESG wéi am ESC haut op eng Rei pädagogesch Ressourcen zeréckgräifen, déi inhaltlech, sproochlech an didaktesch un de Lëtzebuerger Kontext adaptéiert sinn an am Fach Geschicht kënnen benotzt ginn.

Material, wat ë. a. vum Zentrum fir politesch Bildung ausgeschafft ginn ass a wat gratis a meeschtens och digital zur Verfügung steet, befaasst sech och mat relevanten histoireschen Themen (z. B. dem Zweete Weltkrich zu Lëtzebuerg; 100 Joer Demokratie; Erënnerungskulturen zu Lëtzebuerg).

Donieft ginn et och Online-Ressourcen, z. B. vun der Uni Lëtzebuerg (zur Geschicht vum Éischte Weltkrich aus Lëtzebuerger Perspektiv) oder vum Service de Coordination de la Recherche et de l'Innovation pédagogiques et technologiques (SCRIPT) op [www.kulturgeschicht.lu](http://www.kulturgeschicht.lu), déi jidderengem zur Verfügung stinn.

Doriwwer eraus ass de SCRIPT ganz oppen, fir d'Iddi ëmzesetzen, fir op den neie Programm zougesechnitten didaktesch Materialien (analog an digital) fir den ESC ze entwéckelen, zesumme mat Enseignanten aus de Lycéeën.

Am Moment leeft an deem Zesammenhang e partizipative Prozess, bei deem vilfälteg Aspekter vum Curriculum analyséiert goufen, an elo d'Propose vun engem Aarbechtsgrupp zu de Contenuen, der Evaluatioun an der pädagogescher Approche a Workshopen iwwerschaaft a verfeinert ginn. Hei sinn

esouwuel d'Programmkommissioun wéi och all interesséiert Geschichtssenseignantë ganz enk mat agebonnen. Mat éischte Conclusiounen ass um Enn vum lafende Schouljoer ze rechnen. An enger weiderer Phas kënnen dann dem Curriculum entspriechend Unterrechtmaterialien entwéckelt ginn, dat mat der Ënnerstëtzung vum SCRIPT, deem zanter 2017 d'Maison d'édition vun der Éducation nationale ass an deem zesumme mam Terrain tëscht 30 a 40 Schoulmaterialie pro Joer konzipiéiert.

Lëtzebuerg, de 17. Dezember 2021

De Minister fir Educatioun,  
Kanner a Jugend

(s.) Claude MEISCH